

29 MAR 2000

Isa-Umno

KEPUTUSAN MENANG DUA JAWATAN TERTINGGI PARTI TEPAT, KATA ISA

SEREMBAN, 29 Mac (Bernama) -- Menteri Besar Tan Sri Mohamed Isa Abdul Samad berkata kemenangan tanpa bertanding Datuk Seri Dr Mahathir Mohamad dan Datuk Seri Abdullah Ahmad Badawi sebagai presiden dan timbalan presiden Umno amat tepat bagi kebaikan parti.

Beliau yang juga pengerusi Badan Perhubungan Umno negeri berkata ini bermakna Umno bahagian mengambil kira nasihat Majlis Tertinggi (MT) supaya kedua-dua jawatan tertinggi parti itu tidak dipertandingkan.

"Kita rata-rata menyedari jika ada pertandingan di peringkat itu Umno pasti akan berpecah dan dalam keadaan sekarang kita tidak mampu lagi melihat perkara itu berlaku kerana kita perlu menguatkan Umno bagi menghadapi parti pembangkang dan pilihan raya umum 2004," katanya di sini, hari ini.

Katanya, Umno juga perlu menunaikan tanggungjawab setelah memenangi pilihan raya umum lepas.

"Saya sebagai anggota MT mengucapkan terima kasih kepada semua bahagian yang begitu rasional dan mengambil berat meletakkan kepentingan parti daripada kepentingan lain.

"Dengan keputusan ini saya yakin Umno akan bertambah kuat dan padu...tidak nampak bibit-bibit perpecahan dan kita boleh menunaikan tanggungjawab kita mengukuhkan parti dan kerajaan.

"Dengan tiadanya pertandingan jawatan itu akan menjadikan Umno itu "aman"...tiada politik yang melampau. Kita telah ada pengalaman sebelum ini dan kita dapati dahsyat sekali kaedaannya," katanya.

Ditanya mengenai pertandingan jawatan naib presiden, beliau yang merupakan salah seorang daripada calon yang akan bertanding jawatan itu berkata ia terserah kepada perwakilan untuk memilih yang terbaik untuk jawatan itu.

Mengenai penglibatan raja-raja Melayu menyelesaikan masalah perpecahan orang Melayu, beliau berkata raja-raja Melayu sebagai ketua agama Islam memahami keadaan itu dan timbul kesedaran dan tanggungjawab di kalangan mereka untuk membantu mengekalkan perpaduan umat Islam di negara ini.

"Jangan ada pihak yang menganggapkan kita hendak politikkan raja-raja Melayu pula...itu tidak benar sama sekali. Kita tidak berniat mengheret raja untuk berpolitik," katanya.

-- BERNAMA

rp RI